

■ GLOSSA

# La tualetta ed il Gualser

DA GISULA TSCHARNER

**I**gl è succedì lunsch davent da la Rumantschia, en Italia a la Riviera, e tuttina hai jau puspè constata che la tualetta è il lieu predestinà per eveniments fundamentals, elementars da la vita. Igl è succedì en in pissoir, pia en ina spezia da tulaetta ch'è riservada exclusivamain ad ina mesadad da la carstgaunadad. Igl è succedì durant in'emna da raiver, però l'aventura en il pissoir ha surmuntà las acrobaticas vi dal grip e cun la suga. Igl è succedì ad in represchentant da l'autra spezia rara en Grischun, numnadamain ad in Gualser. Quest um, in guida da muntogna urhig, flott e nunrumantsch, ha bunamain pers sia dignitad e libertad, lezza davosa saira en la tualetta dal bogn cuvert da Loana.

**S**tà esi uschia: Nus trais dunnas entrain, plain energias da la lunga nudada, en la cafeteria, nua che noss guida ha ditg d'ans spetgar, perquai ch'in Gualser genuin

*na sa nodia tant ditg sco las dunnas da la Bassa.*

**E**d el spetga bain là, sesend davos sia biera, ma sia fatscha è curiusa, ina maschaida da malsegidaivel e da perplex. Nus dunnas riain da crappar cur ch'il Gualser ans raquinta la disfortuna en il pissoir.

**E**l haja fatg sia caussa d'umens, q.v.d. spons aua, e vulì der-schentar suenter, sco chi s'auada, smaccond il bot inditgà. Ma aua na saja vegnida nagina. El haja smatgà anc ina gia il bot, ed anc ina gia pli ferm... kschschsch! In chatschun d'auas haja squitrà, betg en la stgadella alva, ma orizontalenora, cun forza infernala directamain cunter el. Be cun in sigl spontan haj'el savì sa spindrar dal diluvi sanitar – (Evidentamain s'è decidì il bischen d'aua da rumper precis en il mument ch'il Gualser grischun ha visità il lieu scret dal bogn cuvert!)

**R**ealisond quai, haj'el valità sia situaziun: Ses sigl da reflex a la vart haj'el fatg cunter la paraid davos enstagl vers l'esch, disgraziaivlamain. Uschia saj'el stà en-serrà tranter trais paraids alvas ed il radi d'aua che fascheva la barriera sin l'autezza dal venter. Aunas sgarschaivlas cun la pressiun da las entiras muntognas Liguraisas! E betg carstgaun denturn! Nunpussaivel da clamar e surturnar la canera da l'aua!

**I**saja stà da decider: U siglir suravi u sa ruschnar sutvi. per siglir haja mancà il spazi per la cursa. Pia saj'el cun fadia sa ruschnà sut l'aua vi, cun ina buna porziun aua en la giacca suenter, e curi ord il lieu smaledi e saja curi tras il lung corridor per tschertgar in imploia u x-in um che fiss habel d'agir en la catastrofa. Nagut, nagingin. Finalmain, l'um davos la cassa saja stà pront da tadlar la novitad alarmona. Il bunatsch haja dauzà plaun plaunet e sia massa da corp ed haja murmugnà, mez a sazez: «Vogliamo vedere...»